
ЮРТДОШЛАРИМИЗГА ЎЗИГА ХОС ТАРИХИЙ СОВҒА

Ёзёвон вилоятдаги “энг ёш” туманлардан саналади. Худуд Марказий Фарғона чўлларини ўзлаштириш жараёнларида, 1952 йилда тузилган. 1980, 1989 йилларда икки бора қайта ташкил этилган.

Туманда янги йил арафасида кўп қувончли воқеалар рўй беряпти. Бугун замонавий кўринишга эга давлат хизматлари маркази биноси фойдаланишга топширилди. Бинонинг ўзига хослиги шундан иборатки, бу ерда тадбиркорлар мурожаатларини кўриб чиқувчи Бош вазир қабулхонаси, чет эллик ҳамда маҳаллий инвесторлар учун алоҳида музокаралар хонаси, кутубхона, она ва бола майдончаси, инфокиоск, навбат билан қабул қилиш қурилмаси мавжуд. Бу қулайликлар марказ ходимларини жисмоний ва юридик шахсларга янада тез ва сифатли хизмат кўрсатишига шароит яратди.

Маълумки, бугунгача давлат хизматлари маркази мослаштирилган бинога вақтинча жойлаштирилган эди.

Мана энди замонавий давлат хизматлари марказининг янги биноси туман аҳлига кенг имкониятлар эшигини очди.

Шу муносабат билан бшлгантантанада туман ҳокими Й.Бойигитов, Давлат хизматлари агентлиги вилоят бошқармаси бошлиғи Р.Бойқўзиева сўзга чиқишди. Тадбирда ҳоким ўринбосарлари, сектор раҳбарлари, жамоатчилик вакиллари ва оммавий ахборот воситалари мухбирлари иштирок этишди.

Марказда бир вақтнинг ўзида 14 нафар, бир кунда 500 нафар фуқарога хизмат кўрсатиш имконияти мавжуд. Хушбичим ва ўзига хос дизайндаги замонавий жиҳозланган залда 3 та мониторда 130 дан ортиқ давлат хизматлари юзасидан маълумотлар марказга келувчи фуқаролар учун мунтазам тақдим этиб борилади.

Туман Давлат хизматлари маркази “Оазис” МЧЖ томонидан давлат шерикчилиги асосида қуриб фойдаланишга топширилди.

Фарғона вилояти ҳокимлиги Ахборот хизмати.

2019-12-29 17:55:48